

BANDUCÊI

Di dut il davuei pre-eletorâl, al è restât dome il pedrât plen di sfueis, sfueuz, sfueons, e i mûrs pastrocjâz di manifesc' di ogni fate e di ogni falsetât. Come dopo une grande montanade: grant lavôr pai stradins. La int e à tornât a cjapâ la so ande e i partîz si stan lengint lis plais cuanche nissun no ju sint. Uficialmentri, come sinpri, e àn vuadagnât duc'. Sotvie però e scugnaran cjapâ note di chêi vinc' su cent che no àn votât parceche a son ingomeâz avuâl di chî.

Che ca e là cualchi pome verde e veti cjapât un tic di rôs o l'incontrâr, si pò ancje ametilu. Al fâs part dal pendolarîsin talian. Cumò al va sù un; la volte dopo, stant che nol à savût nè podût nè volût contentâ, si torne a meti sù cheâtre cite. E chest butâsi di un Erode a Pilato al dà propit l'idèe di un banducel ch'al bat mo a drete mo a çanpe. Ma il sun al è sinpri chel: l'incasinament e il berdei al sta tal mani, tal sistema dai partîz, tal lor telâr sclarotic che no rivin adore di saltâ fûr dal furmiâr ch'a son plonbâz dentri. Co si smicje prime `e ideologje e podopo, s'al vanse, al ben de int, al è clâr che pal popul al reste dome il vues. E la rabie di votâ cuintre.

Un biel gei di vôz jù àn cjapâz, in Italie, i partîz otonomisc' locâi, sicu la Volkspartei e il Partît-Popolâr Trentin-Tirolês; ben ancje in Valdoste. Un speracul po' in Sardegne, là ch'a scomencin a capî, salacôr, che ur torne plui cont a mandâ a traj Rome che no a puartâ vie int.

Dome chî di nô il partît furlan, ch'al vares sameât di fâ stragjo, nol à rivât plui in là di cualchi biel risultât in cualchi lûc, plui pe idèe che no pes personis. E difat, si à viodudis pocjs preferenzis. La int furlane, stufe de mafie taliane, e à voe di sintî no un âtri colp di banducel, ma une cjanpane difarent, ancje se il coro cu lis cjanpanis tailanis al stone. Ansit, miôr ancjmò.

Par chel si à di pensâ a alc in merit par no che si smamisi cheste buine idee dai furlans no ancjmò rassegnâz dal dut `e invasion e al fiagjel di chestis comediis «all'italiana».

Ultime notute: il stragjo dai melons che si à vût des bandis di Triest. Une vendeme mai viodude sot il nestri riguart e di cheste stagjon. E cun chel tinp ch'al ere, po! si viôt propit che il siroc e lis tenpèriis di cheste viarte fûr di plonp e àn rivât adore di fâ frutulâ ancje lis cretussis dal Cjars. Chî di nô, invessit, cu la stesse clime, un disordin di côcis. Tocjarà partant cjatâ fûr in curt une samente juste ancje par nô. No si pò meti te stesse stagnade regjonâl melons e côcis. Ce figure fàsino?

